

VENDIM
Nr. 106, datë 3.4.2013

MBI VLEFISHMËRINË E LICENCËS SË SUBJEKTIT TELEVIZIV VENDOR
“TV TELE 4”

Këshilli Kombëtar i Radios dhe Televizionit, i përbërë nga:

Endirë Bushati	kryetare
Sami Nezaj	zëvendëskryetar
Suela Musta	anëtare
Gent Ibrahim	anëtar
Zylyftar Bregu	anëtar

pasi mori në shqyrtim çështjen me:

OBJEKT: Mbi vlefshmërinë e licencës së subjektit televiziv privat vendor “TV Tele 4”.

BAZA LIGJORE: Neni 7 pika 21, neni 33 pika 5 të ligjit nr. 8410, datë 30.9.1998 “Për radion dhe televizionin publik e privat në Republikën e Shqipërisë”, të ndryshuar, Këshilli Kombëtar i Radios dhe Televizionit,

VËREN SE:

Me vendimin nr. 800, datë 17.4.2009, KKRT ka licencuar shoqërinë “Antipatrea” sh.p.k., për subjektin televiziv privat vendor “TV Tele 4”, duke e autorizuar të funksionojë si operator televiziv privat vendor në fushën e transmetimeve televizive analoge për të mbuluar me sinjal qarkun Berat.

KKRT-ja konstaton se subjekti televiziv “TV Tele 4” nuk ka shlyer detyrimet financiare, pagesën vjetore për licencë dhe taksën për shërbimet rtv, pavarësisht njoftimeve të herëpashershme nga KKRT.

Kështu, KKRT-ja me shkresat nr. 316 prot., datë 23.2.2010, nr. 604 prot., datë 19.5.2010, nr. 786 prot., datë 23.7.2010, nr. 578 prot., datë 4.4.2011, nr. 800 prot., datë 29.4.2011 dhe nr. 286 prot., datë 23.2.2012, ka njoftuar zyrtarisht subjektin televiziv “TV Tele 4”, por pavarësisht këtyre njoftimeve subjekti vazhdon të jetë debitor ndaj KKRT-së, në masën 306.000 lekë, ndërsa ndaj Buxhetit të Shtetit në masën 384.000 lekë. Vlera totale e detyrimit financiar është 690.000 lekë.

Më tej, me shkresat nr. 761 prot., datë 5.6.2012 dhe nr. 1065 prot., datë 13.7.2012, i është ripërsëritur kërkesa për kryerjen e pagesave duke u paralajmëruar se në rast të mosshlyerjes së detyrimeve, nga ana e KKRT-së, do të ndiqen procedurat për bërjen të pavlefshme të licencës së subjektit.

Me vendimin nr. 19, datë 18.1.2013, KKRT-ja ka njoftuar subjektin televiziv privat vendor “TV Tele 4” për fillimin e procedurave për bërjen të pavlefshme të licencës së subjektit. Pavarësisht se është njoftuar edhe për vendimin e mësipërm, subjekti vazhdon të jetë debitor ndaj KKRT-së.

Neni 33 i ligjit nr. 8410, datë 30.9.1998 “Për radion dhe televizionin publik e privat në Republikën e Shqipërisë”, të ndryshuar, parashikon se:

“Licenca bëhet e pavlefshme kur:

...

5. kërkuesi nuk realizon detyrimet financiare të parashikuara me ligj pas 90 ditëve nga momenti kur merr dijeni zyrtarisht për miratimin e saj.”.

PËR KËTO ARSYE:

Këshilli Kombëtar i Radios dhe Televizionit, në mbështetje të nenit 7, pika 21, nenit 33, pika 5 të ligjit nr. 8410, datë 30.9.1998 “Për radion dhe televizionin publik e privat në Republikën e Shqipërisë”, të ndryshuar,

VENDOSI:

1. Të bëjë të pavlefshme licencën nr. 092/TVL të subjektit televiziv privat vendor “TV Tele 4”.

2. Subjekti sipas pikës 1 të ndërpresë menjëherë transmetimin.
 3. Ngarkohet administrata e KKRT-së për zbatimin e këtij vendimi.
 4. Kundër këtij vendimi mund të bëhet ankim në gjykatë brenda 30 ditësh nga marrja dijeni, në përputhje me Kodin e Procedurës Civile, kreu “Gjykimi i mosmarrëveshjeve administrative”.
- Ky vendim hyn në fuqi pas botimit në Fletoren Zyrtare.

KRYETARE
Endirë Bushati